

Our da meis album rumantsch

Autor(en): **Gaudenz, Duri**

Objektyp: **Article**

Zeitschrift: **Annalas da la Societad Retorumantscha**

Band (Jahr): **103 (1990)**

PDF erstellt am: **22.06.2024**

Persistenter Link: <https://doi.org/10.5169/seals-235507>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Our da meis album rumantsch

da Duri Gaudenz

Dal 1973 n'haja fingià publichà ün artichel aint illas Annalas cun listess titul. L'album, quai es mia collecziun, quai ch'eu n'ha dudi, am remarchà, raschlà a mantun e nodà durant ils ons. Eu n'ha gnü ons ed ons ch'eu vaiva üna ter feivra d'adampchar mias cugnuoschentschas dal rumantsch, ch'eu pes-chaiva mincha expressiun chi'm gniva ad uraglia, ch'eu interrumpaiva suvent ün discuors cun inchün, fond la dumonda: «Che pled ha'La güsta dit? N'haja dudi inandret? E co dovr'Ella quist pled?» – Uschè s'impla plan sieu l'album fin a l'ultima pagina; lura as poja tour e til metter sülla curuna culla superbogia dal ramassader! Na, i's tuorna a til tour giò, a metter laint il nas, a verer che chi s'ha tgnü adimaint e che chi'd es fingià passà tanter las sfalizchas. La repetiziun es para la mamma da la scienza; ed hoz fetscha üna pitschna repetiziun insembel cun Vus, meis stimats legiadere e mias stimadas legiadras. Nus nu lain esser pedants; nus lain be tscherner da tuot quista lovera tschertas paginas chi pudessan interessar a quels chi'd han insomma interess linguistics.

Üna robina interessanta chi nu schmütscha a quel chi fa uraglias d'mür es quella, cha in Engiadina suot, pro tschertas construcziuns, i's lascha davent l's da plural. Che roba! Che degeneraziun! In *pac* dis es quia la prümavaira. – Quai es fingià *bler* ons cha quai es capità. Impustüt pro quists duos adjectivs, *pac* e *bler*, gniva invlidà il plural. Chi sa perche? Schi füss ün pass in direcziun dal tudais-ch, as stessa spettar quist svilup analog eir pro *bleras* otras construcziuns. Forsa es il motiv quel, cha quists duos adjectivs vegnan dovrats adüna *davant* ils substantivs e chi stan lura sco attach ün a tschel e chi basta lura d'ün *s* e nu fa dabsögn da duos. L'appariziun imperò es curiusa. Ella dà in ögl e tocca aint in l'album. Natüralmaing cha'l magister es fingià nan dasper il scolar cun seis rispli cotschen e fa ün clepper strich. Il scolar as dosta e pretenda cha el haja dudi a sa nona a dir uschea. Mo il magister manaja cha in scoula as scriva sco chi'd es aint illa grammatica e bricha co chi dschavian las tattas.

Una otra robina magara fascinanta sun las chadainas da *duos o da dafatta trais adjectivs* chi vegnan miss ün attach a tschel sainza ingün e tanteraint. Quai nun es madinà üna appariziun be rumantscha. In tudais-ch as faja precis il listess (fuchsteufelswild!). Schi sun duos adjectivs ün sper tschel, schi hana daplü pais, i suottastrichan üna tscherta qualità chi'd ha da gnir accentuada. Quai füss interessant da savair co cha simlas cumbinaziuns s'han fuormadas. Mo quai nu sa ingün. I sun simplamaing quia e sun ün dascus clinöt da la lingua. Provaina güsta da tscherchar ün pêr, be ün pêr, lönych bricha tuots: *Sul sulischem sulet!* Quist sarà forsa l'exaimpel il plü impreschiunant. *Solo soletto* as po dir eir in talian. Mo *sul sulischem sulet* be in rumantsch! *Chüz* es fich pover, mo scha tü stoust dir *chüz zert*, lura esa plü mal, lura la chüzza ha tut il suraman. *Stanguel* es stanguel, ma davo greivs strapatschs est stat üna jada *stanguel mort* (todmüde), *stanguel vaul*, *stanguel caput*, stanguel ... Quai es apunta la ricchezza da la lingua, quistas nüanzas e variaziuns. *Vegl* es vegl, mo tuottacas stögliia dir *vegl vadrüsch*, *vegl antic*, o lura congualond: *vegl sco la crappa d'Uina*. *Süt* es süt, süttischem, süttantà. Mo her ha dit inchün *süt sech*, o d'alch varts n'haja let *muor süt*. Eir quia daja ün congual: *süt sco'l Bügl süt!* L'incuntrari da süt paress *bletsch*. Be chi dà blers grads d'esser bletsch. Be bletsch nun es amo uschè mal. Plü mal esa, cur chi s'es *bletsch cregn*, *mol clitsch*, o lura *bletsch pantan* o dafatta *clitsch cregn (sco ün) pigliat*. *Plain* es ouramâ plain. Mo la lingua nun es amo cuntainta: *Plain stachi*, *plain sfut*, *combel plain*, *plain chi nu gess aint plü gnanca ün'aguoglia*. Nar paress da bastair. Mo'l rumantsch ha chattà illustraziuns: *nar stoc*, *nar (sco üna) zappa*, *nar sco üna s-chella*. Id es greiv o bod impussibel d'interpretar quistas locuziuns. Il plü curius in quist connex am para, cur ch'ün adjectiv as collia directamaing cun ün substantiv. Quia ils grammaticars han stainta e s'approzman darcheu cun lur rispli cotschen. Els tscherchan logica e nu chattan. Be apunta, la lingua nu mangla adüna esser logica. Eu manai construcziuns sco: *nar zappa*, *sech sprella (sco la sprella)*, *bletsch pigliat* ed otras.

Una terza robina m'ha dat in ögl quia in Valsuot e lura eir legiond impustüt autuors sursilvans: Cha'l rumantsch, cur ch'el ha sias glünas, schi ch'el fa simplamaing üna chadaina da duos substantivs chi normalmaing stessan avoir tanteraint la preposiziun *da*, il segn da la relaziun dal genitiv. Quai es üna fatschenda chi po dar sülla gnierva o chi po dafatta far tschüffer la morala: Guardai co cha la germanisaziun as fa strada: Per *Haustüre* hana cumanzà a dir simplamaing *porta chà!* Per *Scheunentor*

porta tablà, per *Huflattich pè puledrin*, e Cla Biert ha scrit d'alch varts be *ragisch gibus*, invezza cha güst füss, seguond la grammatica: *Ragisch da gibus*.

Eu am n'ha indubità adüna cha quista fatschenda da metter a paragl, per uschè dir: suot ün giuf, duos substantivs saja da tour sül seri sco fenomen rumantsch e nu possa gnir s-charbunada sco infecziun o malatia nan da l'intschess tudais-ch. Eu m'indubitaiva uschea, siond ch'eu dudiva a las persunas las plü veglias e las plü rumantschas e terreras a dovrar simlas construcziuns. Fin ch'eu n'ha lura gnü ün grond plaschair: Quist inviern passà ün da meis mats es stat a l'università ad alch lecziun da rumantsch pro'l professor Iso Camartin, ed in quella lecziun es cumparü ün filolog ed ha preschantà precis quist problem tal e qual! Eu intant nun ha tut sü ingün contact cun el. Eu lavur in mia fuschina pitschna. El in seis laboratori cun l'inter instrumentari scientific. L'affar es be stat quel, ch'eu n'ha bod trat ün sigl d'inscuntrar ad inchün sün mia senda deserta.

Uossa vöglija per finir schladar il ventagl, cha tü vezzast ün pa plü concretamaing da che chi's tratta. Seguaints exaimpels sun tipics: Ün *fol giat*, la *flur chadaina*, ün toc *filfier*, il *chantporta*, il *fit chà*, ün *chör chürom dutsch*, ün boffa *semglin*, ün ster *semchonv*, la *nouda chasa*, il *famagl fier*, la *punt fier*, il *barbachan*, ün bel *chör vachetta*, la *flur crap*, l'*hom crap* süsom la muntogna, che bella *flur farina*, hast jent *pan cuc?*, *pon chasa*, sdrajà giò per *banc pigna*, viagià culla *viafier*, hoz haja dat malapaina duos *uondas sulai*, metta aint in *foura pigna*, las *chommas tragliun*, eu n'ha *as-ch chasa* (dret da dmura), *sang nas* e *flur sang nas!* L'*hom strom*.

Da quai ch'eu n'ha vis daja in oters dialects rumantschs amo bler da-plüssas da quistas construcziuns. Il sursilvan es *cregn plain*. La dumonda ch'ün filolog as farà, sarà quella: dingionder cha quists pèrins da plets derivan e co chi sun rivats fin in noss dis. Derivan els l'ultim dal latin classic ingio cha quist sistem da fuormar ün genitiv d'eira tuottafat il solit? *Porta casæ* = *porta chà*; *clavis cellæ* = *la clav schler*. Eu nu'm perguai a solver l'ingiavinerà. Eu listess nu füss bun. I sun oters chi'ns preschaintan soluziuns.

Uossa stöglija però giavüschar als lectuors da nu masdügliar quist problem cun *quel dal partitiv*, ingio cha efectivamaing plü bod in fich blers cas i's mettaiva amo il *da o'l d'* ed hoz desistina a quista preposiziun bod sün tuot la lingua. Eu riv eir quia il ventagl e muoss cas concrets: ün *tatsch naiv*, üna *pruna erba*, ün *majöl vin*, üna *cröa lat*, ün *cop painch*, üna

spoula charn püerch, üna *rotscha utschels*. Esa puchà cha nus discurren hoz uschea e nüglia plü sco üna vouta? Es la lingua ün flüm in movimaint, ardschiglia chi's fuorma e chi's sfuorma?

Pro quist terz chapitel amo ün'ultima annotaziun: I m'ha dat in ögl cha fich blers *noms rumantschs per nossas fluors alpinas* sun noms «suot il giuf dubel». Chi chi's piglia la peida da dar ün tschüt aint il Peer, as po persvader. Ün di suna stat stupefat, cur cha n'ha dudi cha'ls Samignecals giuvens e vegls dischan amo hoz per *Felsenaurikel flur zos* (flur zach).

Lura as poja tour üna jada per mans il *cudesch retic dals noms*, e là s'haja lura üna vaira infinità da noms locals «suot il giuf dubel». Eu noud üna dunzaina dal cumün da Scuol: *Mot Madlain*, *Munt Schombrina*, *Bain Jon Nair*, *Bös-ch Puors*, *Chant Flurin*, *Costas Malcurin*, *Crap Sasstaglià*, *Fuorcla Champatsch*, *Grip Sunteri*, *Motta Naluns*, *Piz Valruschen*, *Pratuor*.

Per glivrar hoz nossa sgurragiada laina ans padimar pro las paginas da l'album chi tiran adimaint il *cudesch da Psalms dal ravarenda Duri Chiampell (1562)*. Chi chi legia aint in quel cudesch, ha differenta letta. El po as paschiunar pella teologia; el po as paschiunar per l'art da la poesia; el po as fascinar per la ricchezza da la lingua da quella jada. Cur ch'eu, avant var quatter ons, n'ha fat meis stüdis da quist il plü vegl cudesch da chant rumantsch, nun haja zavrà tanter ün e tschel e l'oter, teologia, poesia, lingua. Tuot m'ha fat üna ter impreschiun. La teologia d'eira fidelmaing quella da la refuorma. Pro la poesia n'haja noudà suvent la metrica, respectivamaing la fuorma da las strofas e n'ha vis cun che acribia e cun che conseguenza cha Chiampell seguiva seis truois, sainza libertats, sainza cumpromiss bunmarchats. Pro la lingua d'eiran quai interas lavinias chi gnivan da suringìo e chi'd implivan tuot. I nu's gniva bod adasegn da noudar tuot indavorouda. Quists quatter tschientiners chi'ns zavràn ouramai da Chiampell han fat uschè bel ed uschè bain, cha eu pel main da che stun quia sco'l bouv davant l'üsch cuort. Eu nun ha ingün'idea, propch'ingüna, che ch'ün tschert pled vöglià dir. Mobain, eu consultesch *nos grond lexicon*, il DRG, e quel am dà audienza, mo malavita be pel prüm terz da l'alfabet. Per tschels plets daja üna fourina: Eu am sfu aint ün bel di pro'ls büros dal DRG e tschüf sainz'oter access a l'*enorma cartoteca*. Là vess d'esser aint tuot! Stoust be tschampar il dret scrignöl e guardar da nu survera nemain il minder da las tschientineras da scrittins e scrittets.

Stübgiönd uschè la lingua da Chiampell, am n'haja stuvü dir ch'el es amo ün toc plü terrer ed original co seis contemporan Bifrun. Bifrun

cun seis stüdis a l'ester vaiva respirà ons a l'inlunga ajer, dschaina, internaziunal, quai chi'd ha dat ün zichin culur a sia terminologia rumantscha. Chiampell invezza es stat praticamaing adüna ün dals noss. Seis rumantsch savura da nos sögl e da nügli'oter. Minchatant vain el cun viervs chi's chatta be pro Chiampell, be üna, be duos, be trais jadas. Quels sun lura greivs d'interpretar. Minchatant as poja ingiavinar lur sen i'l context dal psalm. Ün'expressiun chi's repeta salda, tuna *cun chiawaigl*. Els fan quai *cun chavagl*. Aint il bellischem artichel dal DRG *chavagl* nun haja chattà (forsa survis) il *chavagl* da Duri Chiampell! *Cun chavagl* v. d. *cun chüra ed exactezza, cun buna vögli!* Oters peds difficils sun p. ex. *a tschöver, s'fultschar, inchalzar, navdaglia, pissar, quassa, rawi, schinck, strövel, tessüra, tschibagia, varvanca, tzuotzlar*. – Quai sun però ils plü difficils, ingio cha eir ils specialists fan fodas aint il frunt. Sco dapertuot: Scha tü hast let il prüm psalm, legiast fingià il seguond, e'ls crötschs fingià nu't disturban plü.

Quists sun stats hoz *quatter argumaints* our da meis album rumantsch.

